

# TUTÚ NÍ CADÚHA TĚ PĀBLŮ QUIHÍ<sup>n</sup> NDAHA ÑÁYIU DISTRITÚ GÁLACIÁ

*Té Pāblú cādūha-dé tutú quihí<sup>n</sup> ndaha nchaá ñáyiú sàndáá iní ñáhá xii Xítóhó Jesucristú ndécú dīstritú Gálaciá*

<sup>1</sup> Te yúhú té Pāblú ní tendaha ñaha Xítóhó Jesucristú, ndihí Dútú Ndiöxí véxi-í càhá<sup>n</sup>-í tnúhu-gá. Te ñu Yá Ndiöxí ní dándótó-gă Xítóhó Jesucristú Yáá ní xíhí ní cūu. Te cāchí tnúhu-í xii-ndo sã ñà dīú ñáyiú ñuyíú-a ní tēndaha ñaha xii-í véxi-í, te ni Yá Ndiöxí te ni Xítóhó Jesucristú ñá túú ní xāha<sup>n</sup>-gă xii ñ<sup>n</sup> ñáyiú quixí-yu cachí tnúhu-yu nācuāa cada-í.

<sup>2</sup> Te yúhú té Pāblú cādūha-í tutú-a ndihí nchaá dava-gá ñáyiú ndècu ichi Yá Ndiöxí ndécú ndihí-í iha cuendá daquixi-í ndaha nchòhó ñáyiú sàndáá iní ñáhá xii Xítóhó Jesucristú ndécú dīstritú Gálaciá.

<sup>3</sup> Te xicá<sup>n</sup> táhù-í núú Dútú Ndiöxí, ndihí núú Xítóhó Jesucristú sá ïo na chīndee chitúu ñaha-gá xii-ndo, te duca<sup>n</sup> ndi nduú-gá ná cādá te ïo váha cuu iní-ndó cūndecu-ndo.

<sup>4</sup> Te Xítóhó Jesucristú ní xíhí-gá sá cuendá nchaá cuéchi nchoo cuè ñáyiú ndècu ñuyíú-a. Te duca<sup>n</sup> ñi quide-gá, chi cuiní-gá sá vã cūndècu-o ichi cuehé ichi duha. Te duca<sup>n</sup> ñi cuu, chi Dútú Ndiöxí duca<sup>n</sup> ñi cuiní-gá cūnduu. <sup>5</sup> Te ïo chí ná ndàcá<sup>n</sup> táhú-ó nūú Yá Ndiöxí cuendá sá ïo càhnu cuu-gá, te ñu-ni duca<sup>n</sup> càda-o ni caa ni quihí<sup>n</sup>! Te duca<sup>n</sup> na cūnduu.

*Mee-ni tnũhu Xítohó Jesucrístú cúu-xi tnũhu sá cãhá<sup>n</sup> nãcuáa naníhí tãhú-ó*

<sup>6</sup> Te ío cũnúhu-í cúu chi ío ndĩhi ní dáñá-ndó ìchi Yá Ndiõxí. Te Yaá-á<sup>n</sup> nĩ cãhá<sup>n</sup> ñáhá-gã xii-ndo, chi Xítohó Jesucrístú ío ní cundàhú iní ñáhá-gã ní quide váha ñaha-gã xii-ndo, te vitna dàcuaha tucu-ndo ìngá tnúhu, te cãchí-ndó sã xĩã<sup>n</sup> dàcãcu nihnu ñaha-xi xii-ndo núú ùhú núú ndàhú. <sup>7</sup> Dico ñáhá, chi ñá túú-gã tnúhu sá dácãcu nihnu ñaha xii-o núú ùhú núú ndàhú. Te dícó-ni sá ío ñáyiu véxi dàticá nuu ñáhá-yu xii-ndo dãnèhé ñáhã-yu tnúhu sá dácũta nihnu ñaha xii-ndo, chi tnúhu-á<sup>n</sup> ñã túú cùu-xi tnúhu Xítohó Jesucrístú. <sup>8</sup> Te yúhú cãhá<sup>n</sup>-í tnúhu Xítohó Jesucrístú, dico núu ío ñáyiu véxi dãnèhé ñáhá xii-ndo ìngá tnúhu sá ñã túú ní dãnèhé ñáhà-í xii-ndo, te nchòhó cachí-ndó sã ñáyiu-á<sup>n</sup> nacháhu-yu núú Yã Ndiõxí sá dúcá<sup>n</sup> quidé-yu. Te cuèi yúhú, te núu na dàma-í tnúhu danèhé ñáhà-í xii-ndo, te ñiu-ni duca<sup>n</sup> cãhá<sup>n</sup>-ndó sã nãchãhu-í núú-gã te núu duca<sup>n</sup> na càda-í. Àdi te núu ì<sup>n</sup> espíritú xínú cuèchi núú-gã véxi-xi cãhá<sup>n</sup>-xi ìngá tnúhu sá ñã túú ní dãnèhé ñáhà-í xii-ndo nãcuáa naníhí tãhú-ndó ñã, te ñiu-ni duca<sup>n</sup> cãhá<sup>n</sup>-ndó sã nãchãhu-xi núú Yã Ndiõxí te núu duca<sup>n</sup> na càda-xi. <sup>9</sup> Te ñiu-ni duha sa ní dãnèhé ñáhà-í xii-ndo sã nõu véxi ñáyiu dãnèhé ñáhá ìngá tnúhu sá ñã túú ní dãnèhé ñáhà-í xii-ndo nãcuáa naníhí tãhú-ndó ñã, te cachí-ndó sã ñáyiu-á<sup>n</sup> nacháhu-yu núú Yã Ndiõxí sá dúcá<sup>n</sup> quidé-yu, duha ní cachí-í xii-ndo.

<sup>10</sup> Te duha ndũu tnúhu cãhá<sup>n</sup>-í chi nchòhó sa xíní-ndó sã yúhú cuíní-í sá Yã Ndiõxí cãhá<sup>n</sup>-gã sá quidé vãha-í ndécù-í, te ñã díú sã ñáyiu ñuyíú-a cachí-yu sá quidé vãha-í, àdi sá ío cùdĩĩ iní-yu nchaa

nàcuáa quide-í ndécù-í. Te núu na càni iní-í cudù-í nùú ñáyü ñuyú-a, te ñá túú cùu-í téé xínu cuechi nùú Xítohó Jesucristú te núu duca<sup>n</sup> na càda-í.

*Nàcuáa ní cuu ní ngüita té Păblú càhá<sup>n</sup>-dé tnúhu Yá Ndiöxí*

<sup>11-12</sup> Te nchòhó ñáyü ndècu ndihí-í ichi Xítohó Jesucristú càchí tnúhu-í xii-ndo sã tnúhu sá dánèhé ñáhà-í xii-ndo nàcuáa naníhí tãhú-ndó cùu-xi tnúhu sá ñí cachí tnúhu mee Xítohó Jesucristú xii-í, te ñá díú ñáyü ñuyú-a ni càhu iní-yu tnúhu-á<sup>n</sup>, àdi danehé ñáhã-yu xii-í, chi mee Xítohó Jesucristú ní dánèhé ñáhã-gã.

<sup>13</sup> Te nchòhó sa ñihí-ndó tnúhu nàcuáa ní xóo cada-í cùtnáhá nchìcú<sup>n</sup> nihnu-í nchaa nàcuáa dàcuaha ñáyü cùu ndi mee-í ñáyü isràél ní cùu. Te dàvá-á<sup>n</sup> ïo ní xóo cuu úhú iní-í nchaa ñáyü ndècu ichi Yá Ndiöxí, te nándi sá ñí xóo cada-í-yu, te ní cuiní-í danàa-í-yu ni cùu. <sup>14</sup> Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyü cùu ndi mee-í dácúúxí ñáyü ñni-í cuìà-í ndihí-yu ni cùu, te ío-gá ní xóo cuiní-í cada ndáá-í canchicú<sup>n</sup> nihnu-í nchaa nàcuáa ní dánèhé ñáhá cuè ñaní tnáhà-í ní xíndecu ndéé sanaha ni cùu. <sup>15</sup> Te ndéé cùtnáhá vátá cécú-gã-í Yá Ndiöxí sa nèhe váha ñaha-gã xii-í cuèndá sá càhá<sup>n</sup>-í tnúhu-gá, núu xíã<sup>n</sup> ní càhá<sup>n</sup> ñáhã-gã xii-í quidè-í chù<sup>n</sup>-gá vitna, te sá dúcá<sup>n</sup> ñí quide-gá te ío váha ní quide ñaha-gã xii-í. <sup>16</sup> Te òré ní càhá<sup>n</sup> ñáhã Yá Ndiöxí xii-í te ní cachí tnúhu-gá cuèndá Déhe-gá Xítohó Jesucristú. Te duca<sup>n</sup> ñí quide Yá Ndiöxí cuèndá sá cuiní-gá sá cũñaha-í xii ñáyü ñá túú cùu ñáyü isràél cuèndá Yaá cúú Dèhe-gá. Te cùtnáhá ní càhá<sup>n</sup> ñáhã Yá Ndiöxí xii-í, te vá yõ ñni-í dèi núú-xi ni ndùcu

tnúhu-í nàcuáa cada-í. <sup>17</sup> Te ni ñà túú ní sáhá<sup>n</sup>-í ñúú Jerusàlén nducu tnúhu-í núú cuè téé díhna nuu nĩ tendaha Xítóhó Jesucristú càhá<sup>n</sup> tnúhu-gá ñuu nása cada-í, chi ndĩhi-ni ní sáhá<sup>n</sup>-í distritú Àrabiá ní xíndecu tnaa-í te dàtnùní cuánuhú tucu-í ñúú Dàmascú.

<sup>18</sup> Te núú ùní cuiá sã nĩ càhá<sup>n</sup> ñáhá Yã Ndiõxí xii-í, te ní sáhá<sup>n</sup> tucu-í ñúú Jerusàlén ní càhá<sup>n</sup> ndĩhi-í té Pèlú, te ní xíndecu-í ndĩhi-dé sáhú<sup>n</sup> nduu. <sup>19</sup> Te tnàhá té Jàcobó ñaní Xítóhó Jesucristú ní càhá<sup>n</sup> ndĩhi-í. Te ñà túú ní xìní-í dava-gá cue téé ní tendaha Xítóhó Jesucristú càhá<sup>n</sup> tnúhu-gá. <sup>20</sup> Te Yá Ndiõxí ndéhé ndĩi ndehe caxi-gá sá ncháá tnúhu tèe-í núú tùtú-a sá cúú-xí-ndó cùu-xi #<sup>n</sup> sá ndàá.

<sup>21</sup> Te sátá nĩ sáhá<sup>n</sup>-í ñúú Jerusàlén, te dàtnùní ní sáhá<sup>n</sup>-í distritú Sìriá, ndĩhi distritú Cìliciá. <sup>22</sup> Te nchaa ñáyiu xíndecu ichi Xítóhó Jesucristú ndécú distritú Júdeá ñà túú xìní ñáhã-yu xii-í ní cùu. <sup>23</sup> Dico ní xóo níhĩ-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáyiu ndècu ichi Xítóhó Jesucristú càhá<sup>n</sup>-dé tnúhu-gá núú ñáyiu cuendá quíndáá iní ñáhã-yu xii-gá, te diu-dé nãndi sá quidé ñàha-dé, te cuíní-dé danàa ñaha-dé cuendá sá vã cóo-gã ñáyiu quíndáá iní ñáhá xii-gá ní cùu”, duha ní cachí-yu cuendá-í. <sup>24</sup> Te ní ngũíta-yu ní cachí-yu sá ïo càhnu cuu Yá Ndiõxí cuendá sá ñà túú-gã quidé-í dàtná ní xóo cada-í.

## 2

*Té Pãblú ní níhí tnáhá-dě ndĩhi dava-gá cue téé càhá<sup>n</sup> tnúhu Yá Ndiõxí*

1 Te ní núnahá úxícúmí cuíá sǎ nǐ sáhá<sup>n</sup>-í ñúú Jerusálén ní cáhá<sup>n</sup> ndihí-í té Pèlú, te dǎtnùní ndécà-í té Bèé ní sáhá<sup>n</sup>, te tnàhá té Títú ní sáhá<sup>n</sup> ndihí-ndí-dé. 2 Te ní sáhá<sup>n</sup>-í chi mee Yǎ Ndiǒxí ní cachí-gá sá quihí<sup>n</sup>-í. Te yàcá<sup>n</sup> ní tacá mee-ni cuè téé cùnūu. Te ní xáha<sup>n</sup>-í xii-güedé nàcuáa ndùu tnúhu dànehé-í ñáyiú ñá túú cùu ñáyiú isràél cuendá naníhí tàhú-yu. Te duca<sup>n</sup> nǐ quide-í cuendá cuìní-í quini-güedé nàcuáa ndùu chiu<sup>n</sup> quide-í, chi nacuáhá<sup>n</sup> cachí-güedé sá ñà túú nàndíhi-xi. 3 Te té Títú téé ndècu ndihí-í chi ñá díú tée isràél cúú-dě, dico ñá túú ní quide yica-güedé cuáha-güedé sèñá ñii-dé. 4 Te ñáyiú cǎchí sá ndécú ìchi Xítóhó Jesucristú te ñá ndáá sá ndécũ-yu ichi-gá, ñáyiú-á<sup>n</sup> nǐ chitnahá ñáhǎ-yu xii-ndí cuendá cuìní-yu quini-yu nása quide-ndí ndécú-ndí ichi Xítóhó Jesucristú. Te duca<sup>n</sup> nǐ quidé-yu cuendá sá nchũhú sa ní cácu nihnu-ndí ñá túú-gǎ quidé-ndí nchaa nàcuáa ní cáhá<sup>n</sup> ndí Moisés. Te cuìní-yu sá núcuíta saa tucu-ndí cada-ndí nchaa nàcuáa ní cáhá<sup>n</sup> ndí núcúndecu-ndí dàtná ní xíndecu-ndí cútnàhá vátá cácu nihnu-gá-ndí núú tnũhu-á<sup>n</sup> ni cùu. 5 Te nchúhú ñá túú tnàhí ni dàña-ndí méé-ndí dandàhú ñáhǎ-yu xii-ndí. Te duca<sup>n</sup> nǐ quide-ndí, chi cuìní-ndí sá ñà túú ñǎgá tnúhu dácánūu ndihí tnúhu sá càhá<sup>n</sup> nàcuáa naníhí tàhú-ó ndècu ndihí-ndo.

6 Te ni ñ<sup>n</sup> tnúhu sá vátá quini-gá-í ñá túú ní cǎchí tnúhu cue téé cùnūu núú ñáyiú cada-í. Dico yúhú chi ñá túú ní quide cuendá-í nũu cùnūu-güedé àdi ñá túú cùnūu-güedé, chi núú Yǎ Ndiǒxí ñ<sup>n</sup>-ni cùu-o nchaa-o. 7 Te ní cutnùní iní-güedé sá Yǎ Ndiǒxí ní cachí-gá xii-í sá càhá<sup>n</sup>-í tnúhu-gá núú ñáyiú ñá

túú cùu ñáyiú isràél dàtná ní quide-gá té Pèlú ní xáha<sup>n</sup>-gã càhá<sup>n</sup>-dé tnúhu-gá núú ñáyiú isràél. <sup>8</sup> Te duca<sup>n</sup> ñi cutnùní iní-güedé, chi ñiú-ni Yá Ndiöxí Yáá chíndèe ñaha xii té Pèlú càhá<sup>n</sup>-dé tnúhu-gá núú ñáyiú isràél, ñiú-ni Yáá-á<sup>n</sup> chíndèe ñaha-gá xii-í càhá<sup>n</sup>-í tnúhu-gá núú ñáyiú ñá túú cùu ñáyiú isràél.

<sup>9</sup> Te té Jàcobó, ndihí té Pèlú, ndihí té Juàá, cue tée ío cùnuu-gá ní cutnùní iní-güedé sá Yá Ndiöxí ío chíndee ñaha-gá xii-í quidè-í chùu<sup>n</sup>-gá. Te ío váha ní cáhá<sup>n</sup> ndihí ñaha-güedé xii-í, ndihí té Bèé, te ní cuu ñi<sup>n</sup>nuu-ndí sá nchùhú quíhí<sup>n</sup>-ndí cáhá<sup>n</sup>-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedé cáhá<sup>n</sup>-güedé tnúhu-gá núú ñáyiú isràél. <sup>10</sup> Te ñi<sup>n</sup>-ni tnúhu ní cáhá<sup>n</sup>-güedé dóho-ndí te ní cachí-güedé xii-ndí sá chíndèe-ndí cue ñáyiú ndàhú, te sa duca<sup>n</sup> tnàhí sàni iní-ndí cada-ndí.

### *Té Pǎblú càhá<sup>n</sup>-dé dóho té Pèlú ñuú Antiòquia*

<sup>11</sup> Te cùtnàhá ní sáhá<sup>n</sup> té Pèlú ñuú Antiòquia yàcá<sup>n</sup> ní cáhá<sup>n</sup>-í dóho-dé, chi quide-dé ñi<sup>n</sup> sá ñà túú tàú-dé cada-dé ní cùu. <sup>12</sup> Te quide váha-dé ní cùu chi xèxi-dé ndihí ñáyiú ñá túú cùu ñáyiú isràél, dico òré ní sáá ñi<sup>n</sup> ùú ñáyiú cùndihí té Jàcobó, te òré-á<sup>n</sup> ñà túú-gã ní cuìní-dé caxi-dé ndihí ñáyiú-á<sup>n</sup>. Te duca<sup>n</sup> ní quide-dé chi ní yùhú-dé cue ñáyiú nchìcú<sup>n</sup> nihnu quide nchaa nacuaá ní cáhá<sup>n</sup> ndí Moisés sá vǎ càhá<sup>n</sup> váha-yu cuèndá-dé. <sup>13</sup> Te tnàhá dava-gá ñáyiú isràél xíndecu ichi Yá Ndiöxí ñá túú quide váha-yu, chi quidé-yu dàtná quidé tǎ Pèlú ní cùu, te ndéé tnàhá té Bèé ní ngúíta-dé duca<sup>n</sup> quide-dé ní cùu. <sup>14</sup> Te òré ní xiní-í sá ñà túú quide-güedé ndihí-yu nàcuáa càhá<sup>n</sup> tnúhu Yá Ndiöxí, te núú

nchàa ñáyiú ndècu ichi Yá Ndiöxí ní xáha<sup>n</sup>-í xii té Pèlú: “Yòhó cúú-n tée isràél, te ñá túú quide-n nchaa nacuáa quide ñáyiú isràél, chi quide-ni-n datná quidé nchaa ñáyiú ñá túú cùu ñáyiú isràél. Te núu duca<sup>n</sup> quide-n, ¿te ná cuendá dánèhé-n ñáyiú ñá túú cùu ñáyiú isràél sá cáďa-yu nchaa nacuáa quide ñáyiú isràél?”, duha ní xáha<sup>n</sup>-í xii té Pèlú.

*I<sup>n</sup>-ni nàníhí tàhú-ó ndíhi ñáyiú isràél núu na quèndáá iní-ó Xítohó Jesucristú ndíhi-yu*

<sup>15</sup> Te yúhú ndíhi té Pèlú cúú-ndí ñaní tnáhá ñáyiú isràél, te ñá túú ndècu-ndí ichi cuèhé ichi duha datná ndécú nchaa ñáyiú ñá túú cùu ñáyiú isràél.

<sup>16</sup> Te xíní-ó sá vǎ cùndècu-gá cuéchi-o núú Yá Ndiöxí te núu na quèndáá iní-ó Xítohó Jesucristú, te ñá díú sǎ cáncíhí<sup>n</sup> nihnu-o cáďa-o nchaa nacuáa ní cáhǎ<sup>n</sup> ndíi Moisés. Te tnáhá dava nchúhú ñáyiú isràél sàndáá iní-ndí Xítohó Jesucristú, te xǎ<sup>n</sup> cútnùní iní-ndí sǎ ñà túú-gǎ cuéchi-ndí ndécú núú-gǎ, dico ñá díú sǎ ñí cáncíhí<sup>n</sup> nihnu-ndí ní quide-ndí nacuáa ní cáhǎ<sup>n</sup> ndíi Moisés, chi cuendá sǎ sàndáá iní-ndí Xítohó Jesucristú. Te vǎ yǒo ñ<sup>n</sup> cachí-ó sǎ ñà túú ndècu cuéchi-xi núú Yá Ndiöxí cuendá sǎ nchí<sup>n</sup> nihnú-yu nchaa nacuáa ní cáhǎ<sup>n</sup> ndíi Moisés.

<sup>17</sup> Te núu cuíní-ó sǎ vǎ cùndècu cuéchi-o núú Yá Ndiöxí cuendá sǎ sàndáá iní-ó Xítohó Jesucristú, te xǎ<sup>n</sup> cútnùní iní-ó sǎ ñà túú quide váha-o. ¿Te vǎ cúú tnáhí caní iní-ó sǎ Xítohó Jesucristú dánèhé ñáhǎ-gǎ xii-o sǎ vǎ cáďá vǎha-o cùndecu-o! <sup>18</sup> Te yúhú càhí-í sǎ vǎ cáncíhí<sup>n</sup> nihnu-gǎ-ó nchaa nacuáa ní cáhǎ<sup>n</sup> ndíi Moisés, dico núu vitna càhí-í sǎ xíní ñùhu-xi cáďa-o nchaa nacuáa ní cáhǎ<sup>n</sup>

ndíi ña, te ñá túú quide váha-í núú Yă Ndiöxí te núu duca<sup>n</sup> na càda-í. <sup>19</sup> Te yúhú duu<sup>n</sup> duu<sup>n</sup> ní cutnùní iní-í sá vă ndácù-í cada-í nchaa nàcuáa ní cáhá<sup>n</sup> ndíi Moisés nũu xiá<sup>n</sup> ní dǎñà-í ñá túú-gă nchìcù<sup>n</sup> nihnu-í nchaa nàcuáa ní cáhá<sup>n</sup> ndíi cuendá sá cuìní-í cundecu-í sá cúú-xí Yă Ndiöxí. <sup>20</sup> Te Xítóhó Jesucrìstú ní xíhí-gá cuendá-í, dico dàtná tnúhu sá tnàhá-í ní xíhí ndìhi-gá, chi ñá cúú-gă cada-í nchaa nàcuáa sàni iní mèè-í, chi Xítóhó Jesucrìstú-nă ndécú ndìhi ñaha-gá xii-í táxí tnùní ñáhá-gă. Te vitna ndècu-í ñuyíú-a, te ío sàndáa iní-í Xítóhó Jesucrìstú Déhe Yă Ndiöxí, te chìndee ñaha-gá xii-í. Te diu-ni Xítóhó Jesucrìstú ío cùu iní ñáhá-gă xii-í nũu ní xíhí-gá núú cùrúxí sá cuendá-í. <sup>21</sup> Te vitna ñá túú dàquee tíhù-í sá văha ní quide ñaha Yă Ndiöxí xii-í, chi núu ni ndàcu-o vá cùndècu cuéchi-o nũú Yă Ndiöxí cuendá sá nchìcù<sup>n</sup> nihnu-o quide-o nchaa nacuáa ní cáhá<sup>n</sup> ndíi Moisés ní cùu ña, te àú<sup>n</sup> nă cuu ní xíhí Xítóhó Jesucrìstú ní cùu te núu duca<sup>n</sup>.

### 3

*Vá dǎñá ndèé-ó quèndáa iní-ó tnũhu Xítóhó Jesucrìstú*

<sup>1</sup> Te nchòhó ñáyiu distritú Gàlaciá, ñáyiu sa xĩndecu ichi Xítóhó Jesucrìstú, ¿ná cuendá ío ñí iní-ndó ñă cuìní-ndó tnèi-ndo nchaa tnúhu cáhá<sup>n</sup>-gá?, ¿te yoo ní dádǎhu ndodo iní ñáhá xii-ndo núu duca<sup>n</sup> quide-ndo? Te naha-ndo sá ío váha ní dánèhé ñáhá-ndí xii-ndo nàcuáa ní cuu ní xíhí Xítóhó Jesucrìstú. <sup>2</sup> Te vitna cáhá<sup>n</sup>-ndó nũu sá nchìcù<sup>n</sup> nihnu-ndo nchaa nacuáa ní cáhá<sup>n</sup> ndíi Moisés ní níhí-ndó Espíritú Yă Ndiöxí

ndécú ndìhi-ndo, àdi sá ni sàndáá iní-ndó tnũhu Xítoho Jesucrístú sá nĩ dánèhé ñáhá-ndĩ xii-ndo nĩ níhí-ndó Espíritú-gá ndécú ndìhi-ndo. <sup>3</sup> Te nchòhó ío nĩ dĩquí-ndó chi Espíritú Yă Ndiõxí tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-nă-ndó cuiní-ndó càda-ndo nacúáa ta quide ñaha Espíritú-gá cuáhá<sup>n</sup> xii-ndo ni cùu-á<sup>n</sup>? <sup>4</sup> Te sàni ì<sup>n</sup> sàni úú iní-í cuendá-ndó sã àú<sup>n</sup> nă cuu nándi yáha-ndo ndècu-ndo ichi Yá Ndiõxí. <sup>5</sup> Te xini-ndó sã Yă Ndiõxí ní taxi-gá Espíritú-gá ní ngúndecu ndìhi-ndo, te ní quide-gá sá vă yõ tnàhí ndàcu cada núú-ndó nĩ xini-ndó. Te duca<sup>n</sup> nĩ quide-gá, chi ní sàndáá iní-ndó-gă, dico ñá dĩú cuendá nchaa nàcuáa ní cachí ndíi Moisés cada ñáyiú duca<sup>n</sup> nĩ quide-gá.

<sup>6</sup> Te ndíi Àbrahám duca<sup>n</sup> ìo ní sàndáá iní ndíi Yá Ndiõxí, núu xíã<sup>n</sup> ní cachí-gá sá nĩ cudíu ndíi núú-gă sá dúcá<sup>n</sup> nĩ quide ndíi. <sup>7</sup> Te càchí tnúhu ndáá-í xii-ndo sã ncháá ñáyiú sàndáá iní ñáhá xii Yá Ndiõxí dàtná ní sàndáá iní ñáhá ndíi Àbrahám xii-gá, ñáyiú-á<sup>n</sup> ì<sup>n</sup>-ni cùú-yu ndìhi ndíi núú-gă. <sup>8</sup> Te núú tütú Yă Ndiõxí ní ngódó tnùnì tnúhu váha, tnúhu sá nĩ xáha<sup>n</sup> Yă Ndiõxí xii ndíi Àbrahám, te duha ní xáha<sup>n</sup>-gă xii ndíi: “Nchaa ñáyiú nìhì ñuyíú cada váha-í-yu sá cuendá-n”, duha ní xáha<sup>n</sup>-gă xii ndíi. Te sá dúcá<sup>n</sup> nĩ ngódó tnùnì núú tütú Yă Ndiõxí ndéé dàvá-á<sup>n</sup>, te xíã<sup>n</sup> cútnùnì sá sáa nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gă te núu na quíndáá iní ñáhă-yu xii-gă. <sup>9</sup> Te xíã<sup>n</sup> núu nchaa ñáyiú sàndáá iní ñáhá xii Yá Ndiõxí cada váha ñaha-gă xii-yu dàtná ní quide váha-gá ndíi Àbrahám, chi ndíi-á<sup>n</sup> duca<sup>n</sup> nĩ sàndáá

iní ñáhá ndíi xii-gá.

<sup>10</sup> Te nchaa ñáyiú cuíní cada nchaa nàcuáa ní cáhá<sup>n</sup> ndíi Moisés cuendá sá cuíní-yu sá vǎ cùndècu-gá cuéchi-yu núú Yǎ Ndiǒxí, ñáyiú-á<sup>n</sup> dañá ñihnu ñaha-gá xii-yu, chi vá ndácǔ-yu cadá-yu nàcuáa sàni iní-yu, te duca<sup>n</sup> càda-gá chi quèe ndáá-xi nàcuáa càhá<sup>n</sup>-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáhá<sup>n</sup> ndíi Moisés te dañá ñihnu ñaha-gá xii-yu.

<sup>11</sup> Te núú na càncicú<sup>n</sup> ñihnu-ñi-o càda-o nacuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nacuáa vá cùndècu-gá cuéchi-o núú Yǎ Ndiǒxí. Te ndáá chi núú tütú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gǎ cuéchi-xi ndècu ío váha ndècú-yu núú-gǎ. <sup>12</sup> Te núú dìcò ìò ñáyiú quide nchaandi túhú nàcuáa ní cáhá<sup>n</sup> ndíi Moisés ñá, te ñá túú xini ñuhu-xi quindáá iní-yu tnúhu Xítóhó Jesucristú, chi núú tütú Yǎ Ndiǒxí càchí-xi sá núú dìcò ìò ñáyiú ndacu cada nchaa nàcuáa ní cáhá<sup>n</sup> ndíi Moisés ñá, te cundecu váha-yu núú Yǎ Ndiǒxí.

<sup>13</sup> Te tnúhu ní chídó tnùní ndíi Moisés càchí-xi sá ìò ndècu cuéchi-o núú Yǎ Ndiǒxí cuendá sá ñǎ ndácú-ó càda-o nchaa nacuáa ní cáhá<sup>n</sup> ndíi, te cuendá xiǎ<sup>n</sup> tá dàña ñihnu ñaha-gá xii-o cuáhá<sup>n</sup>. Dico Xítóhó Jesucristú ní xido-gá nchaa cuéchi-o cuendá sá vǎ dáñá ñihnu ñaha-gá Yǎ Ndiǒxí xii-o. Te càchí-xi núú tütú Yǎ Ndiǒxí: “Í<sup>n</sup> téé na càta caa-güedé ì<sup>n</sup> yutnu, te téé-á<sup>n</sup> cuú-dé téé dañá ñihnu ñaha Yǎ Ndiǒxí”, duha càchí-xi núú tütú-gá. <sup>14</sup> Te duca<sup>n</sup> ñí yáha Xítóhó Jesucristú, chi cuíní Yǎ Ndiǒxí sá ndùu táhú nchaa ñáyiú ñá túú cùu ñáyiú isràèl cundecu váha-yu dàtná ní nduu táhú ndíi

Àbrahám ndécú vǎha ndíi. Te duca<sup>n</sup> nǐ yáha-gá cuendá nchaa nchoo ñǎyiu sàndáá iní ñǎhá xì-gá ngúndecu ndihí-o Espíritú Yǎ Ndiǒxí sá nǐ cachí méé-gǎ taxi-gá.

*Nàcuáa ní cachí Yǎ Ndiǒxí cada-gá*

<sup>15</sup> Te nchòhó cue ñǎyiu ndècu ndihí-í ichi Yá Ndiǒxí na càchí tnúhu-í xii-ndo nàcuáa quide cue ñǎyiu ñuyíú-a cuendá tecú tnùní-gá-ndó nàcuáa quide Yá Ndiǒxí. Chi ñǎyiu-á<sup>n</sup> òré cuìní-yu cadá-yu ì<sup>n</sup> sá cadǎ-yu, te díhna-gá ndátnúhu-yu te òré cúú ì<sup>n</sup>nuú-yu, te sáha firmá-yu ì<sup>n</sup> tutú te tutú-á<sup>n</sup> vǎ yǒo ì<sup>n</sup> ndacu cáhá<sup>n</sup> sá vǎ nándǐhi-gá-xi, te ni vǎ yǒo-gá ndacu nágá tnúhu chido tnùní núú-xí. <sup>16</sup> Te duca<sup>n</sup> nǐ quide Yá Ndiǒxí ndihí ndíi Àbrahám, chi ní xáha<sup>n</sup>-gǎ xii ndíi nàcuáa cada-gá, te tnúhu-á<sup>n</sup> cúú-xí cuendá méé ndíi ndihí cuendá ì<sup>n</sup> ñaní tnáhá ndíi cundecu ñuyíú-a ndéé cuéé-gá. Te núú tütú-gá càchí-xi sá tnúhu-á<sup>n</sup> cúú-xí cuendá ì<sup>n</sup>-ni ñaní tnáhá ndíi te ñá díú cuendá nchaá-yu. Te ñaní tnáhá ndíi téé cùu cuendá tnúhu-á<sup>n</sup> cúú Xítóhó Jesucristú. <sup>17</sup> Te na càchí tnúhu-í xii-ndo sǎ Yǎ Ndiǒxí ní quide ndáá duu<sup>n</sup>-gá ndihí ndíi Àbrahám nàcuáa cada-gá. Te sa ní cuu cúmí cièndú ócó úxí cuíá sǎ dúcá<sup>n</sup> nǐ xáha<sup>n</sup> Yǎ Ndiǒxí xii ndíi Àbrahám, te dàtnùní ní xáha<sup>n</sup>-gǎ xii ndíi Moisés chido tnùní ndíi nàcuáa cada ñǎyiu, te nchaa tnúhu ní chídó tnùní ndíi Moisés ñá túú dàquee tihú-xi tnúhu sá nǐ xáha<sup>n</sup> Yǎ Ndiǒxí xii ndíi Àbrahám nàcuáa cada-gá. <sup>18</sup> Te núu dicó cuendá nchaa tnúhu sá nǐ chídó tnùní ndíi Moisés ní nàníhí tàhú-ó ñá, te ñá túú-gǎ xíní ñúhu-xi cada cuendá-ó tnúhu ní xáha<sup>n</sup> Yǎ Ndiǒxí xii ndíi Àbrahám cada-gá ní cùu te núu duca<sup>n</sup>. Te

ndíi-á<sup>n</sup> nǐ naníhí tàhú ndíi chi duca<sup>n</sup> nǐ cachí Yǎ Ndiǒxí cada ñaha-gǎ xii ndíi.

19 Te nchaa tnúhu ní cáhá<sup>n</sup> ndíi Moisés ní ngódó núú-xí nchìcú<sup>n</sup> nihnu ñáyíu cuèndá duca<sup>n</sup> cùtnuní iní-yu sá ndécú cuèchi-yu, te nchìcú<sup>n</sup> nihnu-ní-yu ndéé ní sáá nduu nǐ quexìo Yaá cúú ñàní tnáhá ndíi Àbrahám, chi Yaá-á<sup>n</sup> duca<sup>n</sup> nǐ xáha<sup>n</sup> Yǎ Ndiǒxí quixi-gá cada váha-gá nchaa ñáyíu. Te nchaa tnúhu ní chídó tnùní ndíi Moisés, chi Yá Ndiǒxí ní tendaha-gǎ cue espíritú xínú cuèchi núú-gǎ ní sáhá<sup>n</sup>-xí ní xítnúhu ñaha-xí xii ndíi nàcuáa danèhé ndíi ñáyíu. 20 Te Yá Ndiǒxí ñá túú ní cáhá<sup>n</sup>-gǎ núú méé ñáyíu, chi ndíi Moisés ní cáhá<sup>n</sup> ndíi yuhu-gǎ núú-yu, dico cútnáhá ní cáhá<sup>n</sup> ndíi-gǎ ndíi Àbrahám chi núú méé núú íí<sup>n</sup> ndíi ndíi-gǎ ní xáha<sup>n</sup>-gǎ xii ndíi nàcuáa cada-gǎ.

*Nàcuáa ndíi nchaa tnúhu ní chídó tnùní ndíi Moisés*

21 Te nchaa nàcuáa ní chídó tnùní ndíi Moisés, ndíi nchaa nàcuáa ní xáha<sup>n</sup> Yǎ Ndiǒxí xii ndíi Àbrahám cada-gǎ, ñá túú dàquee tíhú tnáhá-xí. Te núú dícó náníhí tàhú ñáyíu nchìcú<sup>n</sup> nihnu nchaa nàcuáa ní cáhá<sup>n</sup> ndíi Moisés ñá te cudíu-yu núú-gǎ cuèndá-ní sá nchìcú<sup>n</sup> nihnú-yu nchaa nàcuáa ní cáhá<sup>n</sup> ndíi ní cùu. 22 Te núú tütú Yǎ Ndiǒxí càchí-xí: “Nchaa nchòhó ñáyíu ndècu ñuyíú ndécú cuèchi-ndo”, duha càchí-xí. Te duca<sup>n</sup> càhá<sup>n</sup>-xí cuèndá quíndáá iní-ó Xítohó Jesucrístú, te naníhí tàhú-ó chi duca<sup>n</sup> nǐ cachí Yǎ Ndiǒxí cada-gǎ.

23 Te cútnáhá vátá cùndècu ndíi-gǎ-ó tnúhu Xítohó Jesucrístú, te nchìcú<sup>n</sup> nihnu-o nchàa nàcuáa ní cáhá<sup>n</sup> ndíi Moisés, te ní cutnùní iní-ó sǎ ïo ndècu cuèchi-o ní cùu. Te duca<sup>n</sup>-ní nchìcú<sup>n</sup> nihnu-o ndéé

ní sáá nduu nĩ quexìo Xítóhó Jesucrìstú ñuyíú-a, te ní sándáá iní-ó-gă. <sup>24</sup> Te nchaa tnúhu sá nĩ chídó tnùní ndíi Moisés ní sanu ichi ñaha-xi xìi-o nacuáa cada-o cùndecu-o, te duca<sup>n</sup>-nì sànu ichi ñaha-xi xii-o ndéé ní sáá nduu ní quexìo Xítóhó Jesucrìstú ñuyíú-a. Te duca<sup>n</sup> nĩ cuu cuèndá quíndáá iní-ó-gă, te vá cùndècu-gá cuéchi-o nũú Yă Ndiöxí. <sup>25</sup> Te vitna ní ngùndecu ndihì-o tnũhu Xítóhó Jesucrìstú, te ñá túú-gă xíní ñuhu-xi canu ichi ñaha nchaa tnúhu ní chídó tnùní ndíi Moisés.

<sup>26</sup> Te vitna tnàhá nchaa nchòhó cúú-ndó dēhe Yă Ndiöxí, chi ní sándáá iní-ndó Xítóhó Jesucrìstú. <sup>27</sup> Te nchòhó ní sandute-ndo dàtná càchí-gá, te ndècu-ndo ndihì-gá, te quède-ndo nchaa nacuáa ní cáhá<sup>n</sup>-gá ndécú-ndó, te ío ndècu yĩñuhu-ndo núú Yă Ndiöxí dàtná ndécú yĩñuhu mee Xítóhó Jesucrìstú. <sup>28</sup> Te vitna ì<sup>n</sup>-nì cùu-o nchaa-o ndecu-o ndihì Xítóhó Jesucrìstú cuèi cùu-o ñáyiu isràèl àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi àdi cuu-o ñáyiu dàñá queé núú chíú<sup>n</sup> pàtróó<sup>n</sup>-xi, te cuèi téé te cuèi ñadìhí ì<sup>n</sup>-nì cùu-o nchaa-o ndecu-o ndihì Xítóhó Jesucrìstú. <sup>29</sup> Te nchòhó ndécú ndihì-ndo Xítóhó Jesucrìstú, te cùu-ndo datná cue ñanì tnàhá ndíi Àbrahám, chi ní nduu táhú-ndó cùndecu váha-ndo nũú Yă Ndiöxí dàtná ní nduu táhú ndìj-á<sup>n</sup> ndécú váha ndíi núú-gă, te duca<sup>n</sup> chi mee-gă duca<sup>n</sup> nĩ cachí-gá cunduu.

## 4

<sup>1</sup> Te nchòhó xìní-ndó sã ì<sup>n</sup> té lìhli chi vátá năgá cuáñaha tătá-dě cuu cuèndá-dé chi lìhli-dé, te ì<sup>n</sup>-nì cùu-dé ndihì téé xìnu cuechi, dico na sáá nduu

cuèhnu-dé, te nduu táhú-dě nchaa sá ndécú ndìhi tátá-dě. <sup>2</sup> Te xító-yu té lihli-á<sup>n</sup> sáhnú-dě ndéé sàá nduu nǐ cachí tátá-dě sá cuǎhaha-dě sá ndúú táhú-dě. <sup>3</sup> Te duca<sup>n</sup> sǎtnahá-xi cùu nchoo, chi nchìcú<sup>n</sup> nihnu-o nchàa nacuáa ní cáhá<sup>n</sup> cue téé ní xíndecu ndéé sanaha nǐ cùu. <sup>4</sup> Te ní sáá nduu nǐ quide Yá Ndiǒxí dàtná ní cachí-gá, te ní tendaha-gǎ Déhe-gá Xítóhó Jesucristú ní quixi-gá ñuyíú-a, ní dácácú ñàha ì<sup>n</sup> ñadihí te ní cuu-gá ñáyiú, te ní quide-gá nchaa nàcuáa ní cáhá<sup>n</sup> ndíi Moisés. <sup>5</sup> Te duca<sup>n</sup> nǐ tendaha Yǎ Ndiǒxí Déhe-gá cuèndá sá vǎ cǎnchìcú<sup>n</sup> nihnu-gá-ó nchàa nacuáa ní chídó tnùnì ndíi Moisés cuèndá duca<sup>n</sup> te cuu-o dèhe Yá Ndiǒxí.

<sup>6</sup> Te Yá Ndiǒxí ní taxi-gá Espíritú Déhe-gá Xítóhó Jesucristú ndécú ndìhi-ndo chi cùu-ndo déhe-gá, te Espíritú-á<sup>n</sup> chíndèe ñaha-xi xii-ndo te cǎchí-ndó: “Yòhó Dútú Ndiǒxí cúú-n Tátá méé-ndǐ”, duha cǎchí-ndó. <sup>7</sup> Te xiǎ<sup>n</sup> cútnùnì iní-ndó sǎ cúú-ndó dèhe Yá Ndiǒxí vitna, te ñá túú-gǎ cúú-ndó dàtná cue ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi. Te sá dúcá<sup>n</sup> cùu-ndo déhe-gá, te Xítóhó Jesucristú taxi-gá nchaa sá vǎha ní cachí Yǎ Ndiǒxí nduu táhú-ndó.

*Té Pǎblú ío sàni iní-dé cuèndá nchaa ñáyiú ndècu ichi Xítóhó Jesucristú*

<sup>8</sup> Te cútnàhá vátá quíndáá-gá iní-ndó tnùhu Yá Ndiǒxí ní xinu cuechi-ndo núú nchàa sá cǎchí-yu cùu ndiǒxí te ñá ndáá sá ndiǒxí cúú-xí. <sup>9</sup> Te vitna nchòhó cǎhá<sup>n</sup> ndìhi-ndo Yǎ Ndiǒxí, te mee-gǎ xìnì ñáhá-gǎ xii-ndo, te ñá túú ndùu váha-xi nanchòcáva iní-ndó càda tucu-ndo nacuáa ní xóo cada-ndo dǐhna, chi nchaa xiǎ<sup>n</sup> ñá túú vèdana nàndìhi-xi. <sup>10</sup> Te nchòhó cǎnehe íi-ni-ndo ndùu

cachí-ndó íí, te ðiu-ni duca<sup>n</sup> quide-ndo dava yoó ndihí dava cuíá, te ndi tnahá nduu sácóo vico ðiu-ni duca<sup>n</sup> quide-ndo cánehe íí-ndó ndùu-á<sup>n</sup>. <sup>11</sup> Te ío sàni iní-í cuèndá-ndó, chi na cuáhá<sup>n</sup> àú<sup>n</sup> nã cuu ní dánèhé ñáhà-í xii-ndo tnúhu Yá Ndiõxí.

<sup>12</sup> Te càhá<sup>n</sup> ndàhú-í núú nchòhó ñáyiú ndècu ndihí-í ichi Xítohó Jesucrìstú sá cádá-ndó dàtná quidè-í ñá túú nchìcú<sup>n</sup> nihnu-í nchaa tnúhu ní cáhá<sup>n</sup> ndíi Moisés, chi yúhú quidè-í vitna dàtná ní quide nchòhó ñá túú ní cãchicú<sup>n</sup> nihnu-ndo nàcuáa ní cáhá<sup>n</sup> ndíi. Te cútnàhá ní xíndecu ndihí ñaha-í xii-ndo ñí quide váha ñaha-ndo xii-í. <sup>13</sup> Te sa nàha-ndo sá cùtnàhá ní cáhá<sup>n</sup>-í tnúhu Xítohó Jesucrìstú núú-ndó ndèé díhna ní cuhú-í, núú xíã<sup>n</sup> ní xíndecu ndihí ñaha-í xii-ndo ñí cáhá<sup>n</sup>-í tnúhu-gá núú-ndó. <sup>14</sup> Te cuéhé sã ñí tnahá-í-á<sup>n</sup> cúú-xí ñí<sup>n</sup> cuéhé sã vã yóo tnàhí cundee ìní-xi cundecu ndihí ñaha xii-í ní cùu, dico nchòhó chi ío váha ní cáhá<sup>n</sup> ndihí ñaha-ndo xii-í, te ñá túú ní sàni cuehé ní sàni duha iní-ndó cuèndá-í, te ní cáhá<sup>n</sup> ndihí ñaha-ndo xii-í dàtná tnúhu sá yúhú cúú-í ñí<sup>n</sup> espíritú xínú cuèchi núú Yá Ndiõxí àdi datná méé Xítohó Jesucrìstú. <sup>15</sup> ¿Te ná ní tnahá-ndó núu ñá túú-gã sání váha iní-ndó cuèndá-í dàtná ní xóo cada-ndo ndèé díhna ío váha ní xóo caní iní-ndó cuèndá-í? Te na càchí tnúhu ndáá-í xii-ndo sã ío ní cuu iní ñáhá-ndó xii-í cútnàhá ní xíndecu ndihí ñaha-í xii-ndo, te nándi sá ndécú ndihí-ndo taxi-ndo xii-í ní cùu, te núu ðicó sá cúú te ndéé tinùu-ndo tava-ndo te taxi-ndo xii-í ní cùu. <sup>16</sup> ¿Te náa cùu úhú iní ñáhá-ndó xii-í vitna cuèndá sá càhá<sup>n</sup>-í tnúhu ndáá tnúhu Yá Ndiõxí núú-ndó-ã<sup>n</sup>?

<sup>17</sup> Te ío ñáyiú ío váha càhá<sup>n</sup> ndihí ñaha xii-ndo, dico ñáyiú-á<sup>n</sup> ñúhú cuéhé iní-yu, chi cuíní-yu sá vã cúú-gã cáhá<sup>n</sup> ndihí tnàha-o, chi mee-nã-yu cun-

decu ndihi-ndo cuení-yu. <sup>18</sup> Te váha quède ñáyiú cãhá<sup>n</sup> ndihi ñaha xii-ndo ndihi tnúhu yiñùhu, te núu cuení-yu cadá-yu ñ<sup>n</sup> sá váha sá cúú-xí-ndó. Te duca<sup>n</sup>-ni na cadá-yu cuèi òré ñá túú ndècu ndihi ñaha-í xii-ndo. <sup>19</sup> Te nchòhó ñáyiú ní sanu ichi-í ichi Xítohó Jesucrístú càchí tnúhu-í xii-ndo sã quidé-xí iní-í dàtná quidé-xí iní ñ<sup>n</sup> ñadìhí ñaha sa ní tnahá òré cacu déhe-xi, te duca<sup>n</sup> quède-xi iní-í, chi ío vãi sani iní-í cuèndá-ndó dàtná ní xóo cada-í ndéé díhna, te duca<sup>n</sup>-ni càda-í ndéé ná sàá nduu càda-ndo nchaa nacuaá cãhá<sup>n</sup> Xítohó Jesucrístú. <sup>20</sup> ¡Te ío váha cada-xi te núu dìcò tnavíí sa ndècu ndihi ñaha-í xii-ndo cuèndá cãhá<sup>n</sup>-í núú-ndó nàcuáa cada-ndo, te ñá cútnúni iní-í nása cada-í cuèndá-ndó!

### *Cuèndá ndíi Àgár ndihi ndíi Sără*

<sup>21</sup> Te nchòhó ñáyiú cuení canchicú<sup>n</sup> nihnu nchaa tnúhu ní cãhá<sup>n</sup> ndíi Moisés, ¿náa ñá túú tècú tnùnì-ndó nàcuáa cãhá<sup>n</sup>-xi tnúhu ní chídó tnùnì ndíi? <sup>22</sup> Chi càchí tnúhu ní chídó tnùnì ndíi-á<sup>n</sup> sã ndíi Àbrahám ní xindecu úú déhe ducu<sup>n</sup> ndíi, te ñ<sup>n</sup>-dé ní cuu déhe ndíi ndihi ñadìhí méé ndíi ndíi Sără, te ñgá-dé ní cuu-dé déhe ndíi ndihi ñ<sup>n</sup> ndíi ní xinu cuechi nũ-yu ní xínani Àgár. <sup>23</sup> Te sá dúcá<sup>n</sup> ñí cacu déhe ndíi Sără, chi mee Yã Ndiõxí ní cundàhú iní ñáhá-gã xii-a<sup>n</sup>, chi duca<sup>n</sup> ñí cachí-gá cada-gá. Dico ndíi ní xinu cuechi-ã<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> sã cóó dèhe ndíi. <sup>24</sup> Te na càchí tnúhu-í xii-ndo nã cúú sã nánèhé ndíi ndúú cue ndíi dìhí-á<sup>n</sup>. Te úú xito ní cãhá<sup>n</sup> Yã Ndiõxí nàcuáa cada-gá, te ñ<sup>n</sup> ndíi-á<sup>n</sup> nánèhé ndíi nàcuáa ní cãhá<sup>n</sup> Yã Ndiõxí xito díhna nuu, te ñgá tucu ndíi-á<sup>n</sup> nánèhé ndíi nàcuáa ní cãhá<sup>n</sup> tucu-gá xito cùu uú. Te ndíi Àgár-á<sup>n</sup> nánèhé ndíi nàcuáa

ní xáha<sup>n</sup> Yă Ndiöxí xii ndíi Moisés yucu Sinài cada ñáyiú, te nchaa ñáyiú nchìcú<sup>n</sup> nihnu nchaa tnúhu-án cúŷ-yu dàtná déhe ndíi Àgár téé ní xinu cuechi, chi téé-án ñà túú tnàhí ni dàñá-dé quee-dé núú chíú<sup>n</sup> pàtróó<sup>n</sup>-dě, te duca<sup>n</sup> sãtnahá-xi cùú-yu chi nchìcú<sup>n</sup> nihnú-yu nchaa nàcuáa ní xáha<sup>n</sup> Yă Ndiöxí xii ndíi Moisés. <sup>25</sup> Te tnúhu Àgár quéé-xi: Yucu Sinài, te yucu-án yíndèhu-xi nació<sup>n</sup> Àrabiá. Te ndíi Àgár-án nánèhé tucu ndíi cue ñáyiú ndècu ñúú Jerusàlén, chi ñáyiú-án ndécú-ní-yu dàtná ní xíndecu ndíi Àgár ndíhi déhe ndíi, chi cue ndíi-án ní cuu cue ndíi ñáyiú ñá túú tnàhí ni dàñá quee núú chíú<sup>n</sup> pàtróó<sup>n</sup>-xi, te duca<sup>n</sup> sãtnahá-xi cùú ñáyiú-án chi nchìcú<sup>n</sup> nihnu-ní-yu nchaa nàcuáa ní cáhá<sup>n</sup> ndíi Moisés. <sup>26</sup> Dico nchoo ñí nduu táhú-ó cùndecu-o ñúú Jerusàlén sáa núú ndécú Yă Ndiöxí, te vitna chi ñá túú-gă nchìcú<sup>n</sup> nihnu-o nchaa nàcuáa ní cáhá<sup>n</sup> ndíi Moisés. <sup>27</sup> Te duha càhá<sup>n</sup>-í, chi núú tütú Yă Ndiöxí càchí-xi:

Yòhó ñaha ní nduu táhú vă cóó děhe-xi ni cùú, vitna cana saa-n sã cúdí ñí-ni-n cuèi vátá quìní-gá-n năsa càcu ñ<sup>n</sup> landú.

Te cuèi ní cuu táhú-n sã vă cóó děhe-n ni cùú dico ío-gá titní déhe-n còo dacúúxí xíchí ñí cuu táhú tnàhí sá cóó děhe-xi.

Duha càchí-xi núú tütú-gá. <sup>28</sup> Te nchoo cuè ñáyiú ndècu ichi Xítóhó Jesucristú vitna cùú-o datná ndíi Isàác, chi ndíi-án ñí cacu ndíi, chi mee Yă Ndiöxí ní cachí-gá sá cacú ndíi. Te duca<sup>n</sup> sãtnahá-xi cùú nchoo chi ní nduu-o děhe-gá vitna chi duca<sup>n</sup> ñí cachí tucu-gá cunduu. <sup>29</sup> Te déhe ndíi Àgár ní nduu táhú tnàhí ndíi sá cacú ndíi ñuyíú-a, te ndíi-án

nĩ cuu úhú iní ndíi ndíi Isàác, te ndíi Isàác-án chi Espíritú Yă Ndiõxí ní quide ní cacu ndíi. Te duca<sup>n</sup> sãtnahá-xi cùu vitna, chi nchaa nchoo ñăyiu ndècu ndihì Espíritú Yă Ndiõxí cúú úhú iní ñáhá ñăyiu xii-o. <sup>30</sup> Te núú tütú Yă Ndiõxí cächí-xi: “Chí nácuicú<sup>n</sup> xíchí xínú cuèchi ndihì déhe-xi na nùhú-yu, chi déhe xíchí xínú cuèchi-án ñà túú nã níhí-dě nduu táhú-dě, chi mee-ni dēhe ñaha ndècu vehe-xi nduu táhú-dě sá cuãñaha tătá-dě”, duha cächí-xi núú tütú-gá. <sup>31</sup> Te nchoo cuè ñăyiu ndècu ichi Xítóhó Jesucristú ñá túú-gã cúú-ó dàtná cúú dēhe ndíi ní xinu cuechi-ã<sup>n</sup>, chi ní cuu-o vitna datná cúú ndíi ní nduu táhú nchaa sá nĩ sãñaha tătá-xi-án. Te duca<sup>n</sup> nĩ cuu, chi Yă Ndiõxí ní dácăcu ñaha-gã xii-o cuëndá sá vă cãncicú<sup>n</sup> nihnu-gá-ó nchàa nacuáa ní cáhá<sup>n</sup> ndíi Moisés.

## 5

### *Canchicú<sup>n</sup> nihnu-ni-o ichi Xítóhó Jesucristú*

<sup>1</sup> Te Xítóhó Jesucristú ní quide-gá năcuáa vá cání iní-ó sã nánihí tãhú-ó te núu na cãncicú<sup>n</sup> nihnu-o năcuáa ní cáhá<sup>n</sup> ndíi Moisés, te diu-ni duca<sup>n</sup> cãni iní-ó cùndecu-o te vá ngõo cãni iní-ó sã nánihí tãhú-ó te núu na cãncicú<sup>n</sup> nihnu-o càda-o nacuáa ní cáhá<sup>n</sup> ndíi, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnàhá vátá cùndecu-gá-ó ichi-a.

<sup>2</sup> Te yúhú té Pãblú cuení-í sá cùndedóho-ndo ñ<sup>n</sup> tnúhu na càhá<sup>n</sup>-í-a. Te núu nchòhó cuáha-ndo sēñá ñ<sup>n</sup>-ndo cuëndá sá sãndáá iní-ndó năcuáa ní cachí ndíi Moisés cada-ndo, te núu duca<sup>n</sup> na càda-ndo ña, te àú<sup>n</sup> nã cuu ndècu-ndo ichi Xítóhó Jesucristú te núu duca<sup>n</sup>. <sup>3</sup> Te dàtná ní cachí-í xii-ndo, te diu-ni duca<sup>n</sup> càhá<sup>n</sup> tucu-í vitna sá nũu nděda-ni càa ñ<sup>n</sup> tée

na cuăha-dé sěňá ñii-dé, te xini ñuhu-xi sá dàcutíí tàú-dé cada-dé nchaa nàcuáa ní cáhá<sup>n</sup> ndíi Moisés, <sup>4</sup> Te nchaa nchòhó ñáyiú sàni iní sá ñà túú-gă cuéchi-xi ndècu núú Yă Ndiöxí cuèndá sá nchìcú<sup>n</sup> nihnu-ndo nchàa nacuáa ní cáhá<sup>n</sup> ndíi Moisés, ñá túú-gă ndécú-ndó ndìhi Xítóhó Jesucrìstú, te ni Yă Ndiöxí ñá túú-gă cùndàhú iní ñáhá-gă xii-ndo càda váha ñaha-gă. <sup>5</sup> Dico nchaa nchoo ñáyiú sàndáá iní ñáhá xii-gă cùdìu-o núú-gă, chi chìndee ñaha Espíritú-gă xii-o, te ndètu cahnu-ná-ó sàá nduu cùñaha núú Yă Ndiöxí xii-o sã cùdìu-o núú-gă. <sup>6</sup> Te nchoo cuè ñáyiú ndècu ndìhi Xítóhó Jesucrìstú ñ<sup>n</sup>-ni quìde-xi cuéi na cuăha-o sěňá ñii-o àdi vá cuăha-o, chi ñá túú chìndee ñaha-xi xii-o nacuáa cundecu váha-o ndìhi-gă. Te ñ<sup>n</sup>dìi díi-ni sá xíní ñuhu-xi quìndáá iní-ó Xítóhó Jesucrìstú, te núu duca<sup>n</sup> na càda-o te cuu iní-ó cuè tnahá ñáyiú-o.

<sup>7</sup> Te nchòhó ío váha quìde-ndo ndecu-ndo ichi Yă Ndiöxí ní cùu, te vitna cùñuhu-í sá ñà túú-gă sàndáá váha iní-ndó tnùhu-gă, te duca<sup>n</sup> quìde-ndo chi ndècu ñáyiú sànu ichi ñaha xii-ndo ìngá ichi. <sup>8</sup> Te ñá díú Yă Ndiöxí Yaá ní cáhá<sup>n</sup> ñáhá xii-ndo duca<sup>n</sup> ni cachí-gă cada-ndo sã vă quìndáá-gă iní-ndó tnùhu-gă. <sup>9</sup> Te nchòhó xíní-ndó sã núu luha levadùrá ná quǐhu yuchi te dàndaa-xi. Duca<sup>n</sup> sãtnhá-xi cùu ñáyiú dàndahú ñáhá xii-ndo, chi cuìní-yu dàcuíta nihnu ñáhá-yu xii-ndo nchàa-ndo. <sup>10</sup> Te yúhú cùtnùní ndáá iní-í sá Xítóhó Jesucrìstú chìndee ñaha-gă xii-ndo cuèndá sá ñă túú năgá tnúhu quìndáá iní-ndó, dico nchaa ñáyiú duca<sup>n</sup> dàndahú ñáhá xii-ndo nacháhu-yu núú Yă Ndiöxí nchaa sá quídě-yu cuéi náí-gă ñáyiú cùú-yu.

11 Te càchí tnúhu-í xii nchòhó ñáyiú ndècu ndìhi-í ichi Yá Ndiöxí sá nùu dìcò dànehé-ni-í ñáyiú sá cuãha-yu sèñá ñíi-yu dàtná ní cachí ndíi Moisés ñá, te vá yõo cuu úhú iní ñáhá xii-í ní cùu, te ni vã tũu úhú iní-yu cuendá sá ñí xíhí Xítóhó Jesucrístú núú cùrúxí ní cùu. 12 Te nchaa ñáyiú dàsatú iní ñáhá xii-ndo sã cuãha-ndo sèñá ñíi-ndo, te váha-gá sá ná cáda-yu mée-yu ñíi<sup>n</sup> tnúndòho, te ñá díú sã dúcá<sup>n</sup> cànuichi ñáhá-yu xii-ndo cùndecu-ndo.

13 Te nchòhó ñáyiú ndècu ndìhi-í ichi Xítóhó Jesucrístú ñi-u-gá ní taunihnu ñaha-gã xii-ndo cuendá sá vã cáncùcú<sup>n</sup> nihnu-gá-ndó nchàa nacuaá ní cáhá<sup>n</sup> ndíi Moisés, dico vá cání ñíi-ndó sã sã dúcá<sup>n</sup> ñí taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vëxi iní-ndó, dico cuu iní tnáhá-ndó ñíi<sup>n</sup> ñíi<sup>n</sup>-ndo te chindee tnàha-ndo. 14 Chi duca<sup>n</sup> càhá<sup>n</sup> Yá Ndiöxí sá cúú ñíi-ó cuè tnaha ñáyiú dàtná cúú ñíi-ó mée-o. Te núu duca<sup>n</sup> na càda-o, te quide-o nchaa nacuaá tàú-xi cada-o dàtná càhá<sup>n</sup> nchaa tnúhu ní chídó tnùní ndíi Moisés. 15 Te núu nchòhó cúú úhú iní tnáhá-ndó ndècu-ndo, te ñá túú quide váha-ndo te núu duca<sup>n</sup> quide-ndo, dico yúhú càchí-í sá vã dúcá<sup>n</sup>-gã cada-ndo cùndecu-ndo cuendá sá vã dácuíta nihnu tnàha-ndo.

*Nàcuáa sàni iní ñáyiú ndècu ichi cuehé ichi duha ndìhi nàcuáa sàni iní ñáyiú ndècu ndìhi Espíritú Yá Ndiöxí*

16 Te na càchí tnúhu-í xii-ndo sã cáda-ndó nchàa nacuaá cuìní mée Espíritú Yá Ndiöxí cada-ndo, te duca<sup>n</sup> te vá cání-gã iní-ndó càda-ndo nãndi nchaa sá cuèhé sá dúhá sàni iní mée-ndó. 17 Chi nchaa xíi<sup>n</sup> ñá túú tnáhá tnúhu-xi ndìhi Espíritú Yá Ndiöxí. Te ñi-u-ni duca<sup>n</sup> quide Espíritú Yá Ndiöxí, chi ñá túú

tnàhá iní-xi nchaa sá cuèhé sá dúhá sàni iní-ndó. Te sá dúcá<sup>n</sup> ñà túú tnàhá tnúhu tnàha-xi xiá<sup>n</sup> ñá túú nihí ndéé-ndó càda-ndo ì<sup>n</sup> sá vâha sàni iní-ndó càda-ndo. <sup>18</sup> Te núu quide-ndo nchaa nacuáa sànu ichi ñaha Espíritú Yá Ndiõxí, te ñá túú-gã táxí tnùní ñáhá nchàa tnúhu ní chídó tnùní ndíi Moisés xii-ndo.

<sup>19</sup> Te nchaa ñáyiu xìní-yu nchaa nàcuáa quide ñáyiu quide cuehé quidé dùha. Te duha quidé-yu: Cue téè càhá<sup>n</sup> ndihi-güedé ñáyiu dìhí te ñá díú ñàdihí-güedé cúŭ-yu, te diu-ni duca<sup>n</sup> xíquide cue ñáyiu dìhí, te nándi-gá nchaa sá cuèhé sá dúhá cuáhá<sup>n</sup> véxi-yu quidé-yu. <sup>20</sup> Te quide cahnú-yu nchaa sá càchí-yu cùu ndiõxí te ñá ndàá sá ndiõxí cúú-xí, te quide nduu tnahá-yu, te cùu úhú iní tnáhã-yu, te nàá-yu, te cùu cuiñú tnáhã-yu, te ío yáchí cúdě<sup>n</sup>-yu, te ndúcú-yu mee-ni sã cúú-xí mée-yu, te ñá túú cùu ì<sup>n</sup>nuú-yu cundecú-yu, te quide d<sup>ì</sup><sup>n</sup> tnahá-yu. <sup>21</sup> Te cùu cuedú ínŷ-yu nchaa sá ndécú ndihi dava-gá-yu, te sàhni tnahá-yu, te ío quihú-yu, te ndì cuu ndi cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa càchí tnúhu-í xii-ndo sã ncháá ñáyiu duca<sup>n</sup> xíquide vá ndúú tãhŷ-yu cundecú-yu núú ndécú Yá Ndiõxí táxí tnùní-gá.

<sup>22</sup> Dico Espíritú Yá Ndiõxí chindèe ñaha-xi xii-o cuu iní tnáhá-ó, te cùdíí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. <sup>23</sup> Te ndàhú iní-ó, te quide-o nchaa nacuáa tàú-ó càda-o, te nchaa xíá<sup>n</sup> chindèe ñaha Espíritú Yá Ndiõxí quidé-ó, te núu duca<sup>n</sup> quide-o, te vá yõo ì<sup>n</sup>-gá cáhá<sup>n</sup> sá ñà túú quide váha-o ndècu-o. <sup>24</sup> Te nchoo cuè ñáyiu ndècu ndihi

Xítohó Jesucrístú, sa nàha-o sá ñí xíhí-gá núú cùrúxí sá cuendá-ó, núú xíá<sup>n</sup> duu<sup>n</sup> duu<sup>n</sup> ní dáñá-ó nchàa ichi cuehé ichi duha, te ñá túú-gã táxí tnùní ñáhá ñì ì<sup>n</sup> sá cuèhé sá dúhá sã ñí xóo cani iní-ó ní cùu.  
<sup>25</sup> Te vitna ní ngúndecu ndìhi-o Espíritú Yã Ndiõxí chíndèe ñaha-xì, te xìni ñuhu-xì sá cádá-ó nàcuáa sànu ichi ñaha Espíritú-gá cada-o.

<sup>26</sup> Te vá cádá càhnu-o mee-o, te vá ndúcú-ó plètú, te ni vã cúú cuèdú iní-ó sã ndécú ndìhi tnaha ñáyiú-o.

## 6

### *Chindee tnàha-o ì<sup>n</sup> ì<sup>n</sup>-o*

<sup>1</sup> Te nchòhó ñáyiú ndècu ndìhi-í ichi Xítohó Jesucrístú càchí tnúhu-í xii-ndo sã nùu ì<sup>n</sup> ñáyiú ndècu ndìhi-ndo ichi-gá ní quidé-yu ì<sup>n</sup> sá ñà túú tàú-yu cadá-yu núú-gã, te nchòhó ñáyiú quide váha ndècu ndìhi Espíritú Yã Ndiõxí cáhá<sup>n</sup>-ndó dõho cue ñáyiú duca<sup>n</sup> xíquide-á<sup>n</sup> cuendá nucúnu ichí-yu, te vii vii cáhá<sup>n</sup> ndìhi-ndõ-yu, te ío coto-ndo mèe-ndo cuendá sá vã cádá-ndó ì<sup>n</sup> sá ñà túú tàú-ndó càda-ndo núú-gã. <sup>2</sup> Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yãha-ndo. Te núu duca<sup>n</sup> na càda-ndo, te quide-ndo nchaa nacuéa ní cáhá<sup>n</sup> Xítohó Jesucrístú cada-o.

<sup>3</sup> Te núu ío ì<sup>n</sup>-ndo càchí-ndó sã ìo váha quide-ndo ndecu-ndo ichi Yá Ndiõxí te ñá ndàá ñã, te dícó dándàhú-ndó mèe-ndo sá dúcá<sup>n</sup> quide-ndo. <sup>4</sup> Te ndì díí<sup>n</sup> ndì díí<sup>n</sup> càda cuendá-ndó nùu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí ìní-ndó sã cúú-xí mèe-ndo, te vá cání ìní-ndó sã quidé vãha-gá-ndó

dàcúúxí dàva-gá-yu. <sup>5</sup> Chi tàú-ó sǎ ndì díí<sup>n</sup> ndì díí<sup>n</sup> càda cuendá-ó nàcuáa ndècu-o.

<sup>6</sup> Te nchaa nchòhó ñáyiu dàcuaha tnúhu Yá Ndiöxí chindee-ndo cuè téè dàcuaha ñaha xii-ndo tnúhu-gá cuáñaha-ndo nǎndi sá xíní ñùhu-güedé.

<sup>7</sup> Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yǎ Ndiöxí, chi nchòhó xíní-ndó sǎ núu na càda váha-o cùndecu-o, te cùu-xi ì<sup>n</sup> sá vǎha sá cúú-xí-ó, dico núu vá cáda váha-o ña, te ío ndoho-o te núu duca<sup>n</sup> na càda-o. <sup>8</sup> Te núu quide-o nchaa sá cuèhé sá dúhá sàni iní-ó, te d̄u-ni xíǎn dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yǎ Ndiöxí xii-o, te cundecu ndih-i-o Yǎ Ndiöxí ni caa ni quíhí<sup>n</sup>. <sup>9</sup> Te xini ñuhu-xi vá dáñá ndèè-ó càda váha-o cùndecu-o, te duca<sup>n</sup> te sáá nduu càda váha ñaha Yǎ Ndiöxí xii-o, te núu vá ná tǔhú iní-ó càda váha-o cùndecu-o. <sup>10</sup> Te cada-o sǎ vǎha sá cúú-xí nchaa tnaha ñáyiu-o vitna ndecu-o ñuyíú-a, te ío-gá tàú-ó chindee-o cue ñáyiu ndècu ndih-i-o ichi Xitohó Jesucristú.

*Tnúhu ndéé núú nǐ ndih-i-ná*

<sup>11</sup> Te cundehe-ndo sǎ ndǎa ndǎa lètrá téè-í núú tütú-a sá cúú-xí-ndó. <sup>12</sup> Te nchaa ñáyiu quide yicá sá cuǎha-ndo sèñá ñii-ndo dàtná ní cachí ndíi Moisés, ñáyiu-á<sup>n</sup> cúú-yu ñáyiu cuíní cud̄u núú tnàha ñáyiu-xi. Te duca<sup>n</sup> quidé-yu cuendá sá vǎ ndóhǒ-yu cuendá nchaa tnúhu sá dánèhé ñáhá sǎ nǐ xíhí Xitohó Jesucristú núú cùrúxí. <sup>13</sup> Te ni ñáyiu sa ní ngúndecu ndih-i sèñá ñii-xi ñá túú quidé-yu nchaa nàcuáa ní cáhá<sup>n</sup> ndíi Moisés, dico mèe-yu cuíní-yu sá cuǎha-ndo sèñá ñii-ndo. Te duca<sup>n</sup> quidé-yu chi quide cahnú-yu mèe-yu núú

nchàa dava-gá ñáyi. <sup>14</sup> Te yúhú chi ñá túú quide cahnu-í mée-í cuendá nchaa sá quidè-í, chi mee-ni sã ïo cùu váha iní-í sá Xítóhó Jesucrìstú ní xíhí-gá núú cùrúxí cuendá-ó. Te ñu cuendá sá ní xíhí-gá ñá túú-gã ndécù-í ichi cuèhé ichi duha, te ni ñà túú-gã táxí tnùní ñáhá nì ì<sup>n</sup> sá cuèhé sá dúhá xì-í. <sup>15</sup> Te ñá túú ñã chíndèe ñaha-xi xii-o cuéi na cuãha-o sèñá ñii-o àdi vá cuãha-o, chi ndècu ndihi-o Xítóhó Jesucrìstú, te ní nduu-o dàtná ì<sup>n</sup> ñáyi saa, te xĩ<sup>n</sup> cúú-xí sã ïo-gá xíní ñùhu-xi. <sup>16</sup> Te xìcá<sup>n</sup> táhù-í núú Yã Ndiõxí sá ncháá nchòhó ñáyi quide nchaa nacuaá càhá<sup>n</sup>-í-a cundecu nahi-ndo, nchòhó ñáyi cùu cuendá Yã Ndiõxí dàtná ñáyi isràél chi ñáyi-á<sup>n</sup> ñi cachí-gá sá cúú cuendá-gá. Te mee-gã ío cundàhú iní ñáhá-gã xii-ndo chìndee ñaha-gá.

<sup>17</sup> Te není vitna cùiní-í sá vã yõo ì<sup>n</sup>-gá chidácá nihnu ñaha xì-í cuendá chiu<sup>n</sup> quide-í, chi yayàcá<sup>n</sup> sa ní nduu tílòhó ñii-í cuendá sá ndóhò-í cuendá Xítóhó Jesucrìstú.

<sup>18</sup> Te nchòhó ñáyi ndècu ndihi-í ichi Xítóhó Jesucrìstú xìcá<sup>n</sup> táhù-í núú-gã sá ïo na chìndee ñaha-gá xii-ndo nchàa-ndo. Te ñuca<sup>n</sup> na cùnduu. Te ío chí cáda ndèe iní-ñã vitna.

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

872f7754-0986-5ecd-a059-925a708a6939